

**Talamdan sa
Mga Mensahe alang sa Full-time Training
sa Fall Term sa 2022**

**LINANGKOB NGA HISGOTANAN:
MAGKINABUHI DIHA SA REALIDAD SA LAWAS NI CRISTO
SA PAGKAT-ON KANG CRISTO MAINGON NGA NAA NI JESUS ANG REALIDAD**

Mensahe 3

**Kat-onan si Cristo maingon nga Naa ni Jesus ang Realidad aron Masama Niya
sa Pagkinabuhi ning Kalibotana sa Kinabuhi sa Dios nga Gugma nga maoy Ihigugma Nato
Niya ug sa Usag Usa**

Basahong Kasulatan: 1 Juan 4:8, 16-19; Juan 21:15-17; 1 Ped. 2:25; 5:1-4; 1 Cor. 12:31b—13:8a

- I. Kinabuhi sa gugma ang kinabuhing nadawat nato sa Dios; nagkinabuhi si Cristo dinhi sa kalibotan sa kinabuhi sa Dios nga gugma, ug Siya ang kinabuhi nato karon aron magkinabuhi ta sa mao rang kinabuhi sa gugma dinhi sa kalibotan ug masama Niya—1 Juan 3:14; 5:1; 2:6; 4:17:**
- A. Ang gugma sa Dios mao ang Dios mismo; ang gugma maoy sulodnong pagkamao sa Dios ug ang kasingkasing sa Dios; gipanganak na ta pag-usab aron mahimong kaliwat sa Dios, matang sa Dios (Juan 1:12-13), ug gugma ang Dios (1 Juan 4:8, 16); kay nahimo na man tang Dios sa Iyang kinabuhi ug kinaiya apan dili sa ranggo sa pagka-Dios, mahimo sab gyod tang gugma; nagpasabot kini nga dili lang kay mahigugma ta sa uban kondili gugma ta mismo.
 - B. Magpabilin gyod ta diha sa gugma sa Dios ug magpapugos sa gugma ni Cristo aron itugyan ang atong kinabuhi tungod ug alang sa mga igsoon—Jud. 19-21; 2 Cor. 5:14; 1 Ped. 1:22; 1 Juan 3:14-16; 4:7-21.
 - C. Unang nahigugma ang Diso kanato kay gipatuhopan man ta Niya sa Iyang gugma ug gipahimugso sa sulod nato ang gugmang gihigugma nato Niya ug sa mga igsoon (vv. 19-21); ang pagpabilin diha sa Dios pagkinabuhi man nga nagbatasan sa paghigugma sa uban pinaagi sa gugma nga mao ang Dios mismo, aron mapadayag Siya dinhi nato—vv. 16-17; *Mga Alawiton*, #546 ug #547.
 - D. “Daniha ko, mogukod mi Nimo” (A. S. 1:4a); “Gibira Ko sila pinaagi sa mga lubid sa tawo, / Pinaagi sa mga bugkos sa gugma” (Oseas 11:4):
 - 1. Ang pamulong *pinaagi sa mga lubid sa tawo, pinaagi sa mga bugkos sa gugma* nagpakita nga gihigugma ta sa Dios sa diosnong gugma Niya dili sa pagkabutang sa pagka-dios kondili sa pagkabutang sa pagka-tawo; diosnon ang gugma sa Dios, apan nidangat kini kanato diha sa mga lubid sa tawo, sa ato pa, pinaagi sa pagka-tawo ni Cristo.
 - 2. Ang mga lubid nga pinaagi niini gidani ta sa Dios naglakip sa pagpakatawo ni Cristo, sa Iyang pagkinabuhi ingog tawo, pagkalansang sa krus, pagkabanhaw, ug pagkayab; pinaagi man ning tanang lakang ni Cristo sa pagka-tawo Niya nga nidangat kanato ang gugma sa Dios diha sa Iyang kaluwasan—Rom. 5:5, 8; 8:35-39.
- II. Ang Juan 21, nga kapitulo kalabot sa pagpangatiman, maoy pagkakompleto ug kahingpitan sa Ebanghelyo ni Juan; sa nabanhaw na ang Ginoo, giatiman Niya si Pedro ug gitahasan nga pakan-on ang Iyang mga nating karnero ug atimanon ang Iyang mga karnero; pagtagik kini sa pagpangalagad sa mga apostol sa langitnong pagpangalagad ni Cristo aron maatiman ang panon sa Dios, ang iglesia, nga mosangpot sa Lawas ni Cristo—vv. 15-17:**

- A. Ang Ebanghelyo ni Juan basahon kalabot ni Cristo nga nianhi aron mahimong atong kina-buhi sa pagpangga ug pagtil-og Niya kanato; ang pagpangga sa mga tawo paglipay, pagpahimuot, ug pagpahayahay man kanila (Mat. 9:10; Luc. 7:34), ug ang pagtil-og sa mga tawo pagpakaon man kanila sa malangkobon-sa-tanan nga Cristo (Mat. 24:45-47):
 1. Sa naila ni Natanael nga Anak sa Dios si Cristo nga Dios-Manluluwas, giingnan Niya siya nga makita niya nga maabli ang langit ug mosaka-kanaog ang mga manulonda sa Dios diha Niya nga Anak sa Tawo, sama sa langitnong hagdan nga nakita ni Jacob sa iyang damgo; usa ka matang kini sa pagpangga aron madasig si Natanael nga mosunod Niya aron makaambit siya sa Iyang pagtil-og sa tanang diosnong kaayohan ingon sa gipadayag sa tibuok Ebanghelyo ni Juan—Juan 1:45-51.
 2. Sa dihang gustong luwason ni Cristo nga Dios-Manluluwas ang babayeng walay moralidad sa Samaria, nipanaw gyod Siya gikan sa Judea ngadto sa Galilea agi sa Samaria ug niliko sa dakong dalan sa Samaria paingon sa syudad sa Sicar, ug naghulat Siya didto sa may atabay ni Jacob, duol sa Sicar nga moabot kadtong bayhana aron makapangga Siya niya sa pagpangayo kaniyang mainom ug aron matil-ogan Niya siya sa tubig sa kinabuhi, nga mao ang nag-agay nga Tulo-usang Dios—4:3-14.
 3. Kay wala may makahukom sa mga Fariseong nangakusar sa mananapaw nga babaye, si Cristo nga Dios-Manluluwas, diha sa Iyang pagka-tawo, niingon niya, “Dili sab Ko mohukom nimo,” sa pagpangga kaniya aron Siya, nga dakong Ako Mao, makapakaon niya sa kagawasan sa sala ug makahimo niya nga “dili na magpakasala”—8:3-11, 24, 34-36.
- B. Sa nabanhaw na ang Ginoo, giatiman Niya si Pedro ug gitahasan nga pakan-on ang Iyang mga nating karnero ug atimanon ang Iyang mga karnero; pagtagik kini sa pagpangalagad sa mga apostol sa langitnong pagpangalagad ni Cristo aron maatiman ang panon sa Dios, ang iglesia, nga mosangpot sa Lawas ni Cristo—21:15-17:
 1. Masaligon si Pedro sa natural niyang kusog ug kahimoan, hangtod ngani nga naghunahuna siya nga makasunod siya sa Ginoo ngadto sa bilanggoan ug sa kamatayon; apan gilimod niya ang Ginoo sa makatulo, bisan atubangan sa batan-on nga sulugoong babaye—Luc. 22:33; Juan 18:15-18, 25-27.
 2. Bug-os gyong napildi ug hingpit nga napakyas si Pedro aron makaamgo siya nga dili gyod siya kasaligan ug dili na mosalig pa sa iyang kaugalingon—Mat. 26:69-75; itandi sa Fil. 3:3.
 3. Ang mensahe sa manulonda sa tulo ka igsoong babaye nga nakadiskobre sa pagkabanhaw sa Ulipon-Manluluwas mao nga “panglakaw mo, sultii ang Iyang mga tinun-an ug si Pedro”—Mar. 16:7; itandi sa 1 Ped. 5:13.
 4. Nagpakita ang pamulong ug *si Pedro* nga bisan napakyas, napandol, ug natumba si Pedro, wala siya biyai sa Ginoo; ang *ug si Pedro* nagpasabot sab og *ug ikaw*—ikaw nga napakyas sama ni Pedro.
 5. Makita unta natong tanan ang kasingkasing sa Ginoo tali nato; imposible gyong dili Siya mahigugma nimo, nga malimot Siya nimo, o mobiya ba Siya nimo—Zac. 2:8; Isa. 49:15-16.
- C. Nasilsil pag-ayo sa panumdoman ni Pedro kining tahas sa Ginoo nga sa unang basahon niya gisultian niya ang mga magtutuo nga sama sila sa mga karnerong nasalaag, apan karon namalik na sila sa Magbalantay ug Maglalantaw (Cristo) sa ilang mga kalag—1 Ped. 2:25.
- D. Gitambagan niya ang mga anciano nga atimanon ang panon sa Dios diha nila aron nga sa ipadayag na ang Pangulong Magbalantay, madawat nila ang dili mokupas nga purongpurong sa himaya (5:1-4); nagpakita ang pulong ni Pedro nga ang langitong pagpangalagad ni Cristo labi gyong nangatiman sa iglesia sa Dios nga panon Niya, nga mosangpot sa Lawas Niya.
- E. Ang labing dakong tuyo ug tumong sa pagpangalagad sa mga apostol nga natagik sa langitnong pagpangalagad ni Cristo pagtukod man sa Lawas ni Cristo, nga mahingpit sa Bag-ong Jerusalem aron matuman ang walay kataposang pamatigayon sa Dios.

III. Modaog gyod unta ang gugma diha nato; ang gugmay maoy labing maayong paagi nga mahimo tang bisan unsa ug makabuhat og bisan unsa aron matukod ang iglesia nga organicong Lawas ni Cristo—12:31b—13:8a:

- A. Mga tawo gyod unta ta nga gibahaan ug gianod sa gugma ni Cristo; sama gyod unta sa daghan kaayong tubig nga nibul-og kanato ang diosnong gugma, nga mopugos nato nga magkinabuhi ngadto Niya ug mahigugma Niya sa kinabug-osan gyod nga dili nato mapugngan—2 Cor. 5:14.
- B. Aron bug-os gyong mahigugma sa Ginoo ug sa usag usa, mga tawo gyod unta nga adlaw-adlawng natuhopan sa Dios nga gugma, nga nangandoy ug nagtinguha nga mopuyo sa balay sa Dios sa tanang adlaw sa atong kinabuhi aron mosud-ong sa Iyang katahom (pagkahiligugmaon, pagkamakapahimuot, pagkamakalipay) ug magpakisayod sa Dios sa Iyang templo; ang magpakisayod sa Dios mangutana man sa Dios kalabot sa tanang butang sa adlaw-adlaw natong kinabuhi—Sal. 27:4.
- C. Ang gugmang gibatbat ni Pablo sa 1 Corinto 13 mao ang pagpadayag sa diosnong kinabuhi (vv. 4-8a); labot pa, kay bunga man sa Espiritu ang gugma nagpakita kini nga ang pagkamao sa gugma mao gyod ang Espiritu (Gal. 5:22); kon wala tay gugma, ang pagpamulong nato sama ra sa gipalanog nga agong ug nagtagingting nga piyangpiyang, nga nagpatingog nga walay kinabuhi (1 Cor. 13:1; 14:1, 3, 4b).
- D. Dili abughoan ang gugma, dili dali masuko, dili tig-isip sa daotan, motabon sa tanang butang, moagwanta sa tanang butang, molungtad sa tanang butang, ug maoy kinalabwan—1 Cor. 13:4-8, 13.
- E. Masama gyod unta ta sa Dios sa paghigugma nato sa uban, mahigugma sa mga tawo nga wala gyoy pagpihig (Mat. 5:43-48); ang unang giluwat ni Cristo sa pagkalansang Niya sa krus dili man buotang tawo, kondili kriminal, tulisan, nga gihukmang mamatay; makahuloganon kaayo kini (27:38; Luc. 23:42-43).

IV. Ang balaod sa Espiritu sa kinabuhi nga naa sa atong espiritu mao ang balaod ni Cristo nga balaod sa gugma (Rom. 8:2; Gal. 6:2-3); ipatinuod gyod sa balaod sa Espiritu sa kinabuhi ang balaod sa gugma aron makapas-anay ta sa mga luwan sa usag usa; apan kon natugob ta sa garbo, dili ta makapas-an sa mga luwan sa uban kay gilimbongan man nato ang atong kaugalingon sa paghunahuna nga si kinsa na ta nga balewala ra man unta ta (v. 3):

- A. Mapalihok na ngani ang balaod sa gugma sa sulod nato, awtomatiko ug diha-dayong mahimo tang mga magbalantay nga naay mahigugmaon ug mapasayloong kasingkasing sa atong Amahan nga Dios ug naay maatimanon ug mapangitaong espiritu sa atong Manluwas nga Cristo—Juan 21:15-17; Luc. 15:3-7.
- B. Mapalihok na ngani ang balaod sa gugma sa sulod nato, paghago sa gugma ang paghago nato diha sa Ginoo (1 Cor. 15:58; 1 Tes. 1:3) nga niini “tabangan nato ang mga maluyahon” (Buh. 20:35) ug “tabangi ang mga maluyahon” (1 Tes. 5:14); nagpasabot ang *mga maluyahon* sa mga maluyahon sa espiritu ba o sa kalag o sa lawas, o sa mga maluyahon sa pagtuo (Rom. 14:1; 15:1).
- C. Espiritu sa gugma ang hinatag-sa-Dios, gipanganak pag-usab nga espiritu nato; nagkinahanglan tag nagdilaab nga espiritu sa gugma aron modaog sa pagkadaot sa iglesia karon—2 Tim. 1:7.
- D. Isip mga sanga ni Cristo, sa tinuod nga punoan sa paras, maghigugmaay gyod ta sa usag usa aron mapadayag ang diosnong kinabuhi diha sa pagpamunga—Juan 15:12-17.
- E. Kinabuhi sa gugmang inigsoon ang iglesihanong kinabuhi (1 Juan 4:7-8; 2 Juan 5-6; Juan 15:12, 17; Bug. 3:7; Efe. 5:2; itandi sa Jud. 12a), ug gitukod sa Lawas ang iyang kaugalingon diha sa gugma (Efe. 4:16).

- F. “Makapaburot ang kahibalo, apan makatukod ang gugma”; maminaw tingali ta sa mga mensahe sa ministri ug moburot tungod lang sa kahibalo—1 Cor. 8:1b; itandi sa 2 Cor. 3:6.
 - G. Ang paghigugmaay nato sa usag usa ilhanan man nga iya ta ni Cristo (Juan 13:34-35); ang ganahang manguna diha sa iglesia batok man sa paghigugma sa tanang igsoon (3 Juan 9).
 - H. Maingon nga gitugyan ni Ginoong Jesus ang Iyang kinabuhi-sa-kalag aron mabatonan nato ang diosnong kinabuhi, wad-on gyod nato ang atong kinabuhi-sa-kalag ug dumilian ang kaugalingon aron mahigugma sa mga igsoon ug mangalagad og kinabuhi kanila nga dunay suod nga pagtagad sa kinabuhing nangalagad—1 Juan 3:16; Juan 10:11, 17-18; 15:13; Efe. 4:29—5:2; 2 Cor. 12:15; Rom. 12:9-13; 2 Cor. 7:2-7; 12:15; Filem. 7, 12.
- V. Ang Salmo 22—24 grupo sa mga salmo nga nagpadayag ni Cristo sugod sa pagkalan-sang Niya sa krus ngadto sa Iyang pagkahari sa umalabot nga panahon; makita nato sa Salmo 22 ang kamatayon ni Cristo, ang pagkabanhaw Niya, ug ang daghang igsoon Niya nga nahimugso sa Iyang pagkabanhaw aron mahimong iglesia Niya; makita nato sa Salmo 23 si Cristo nga Magbalantay sa pagkabanhaw Niya; ug makita nato sa Salmo 24 si Cristo nga umalabot nga Hari sa Iyang gingharian:**
- A. Nagpakita kining tulo ka Salmo nga tungatunga sa pagkamatay ug pagkabanhaw ni Cristo kaniadto ug sa pagbalik Niya ingon nga Hari sa Iyang gingharian sa umalabot naa ang pag-pahimulos, pagsinati, ug pagpadayag ni Cristo nga pneumaticong Magbalantay nato karon.
 - B. Nagpadayag kini nga ang pagpangatiman maoy tulay tali sa unang pag-anhi ni Cristo ug sa ikaduhang pag-anhi Niya; sa langitnong pagpangalagad ni Cristo nangatiman Siya karon sa mga tawo, ug kon moapil ta sa matahom kaayong pagpangatiman Niya, duna unyay dakong pagkadasig pag-usab, bag-ong pagkadasig pag-usab, sa pahiuli sa Ginoo nga magpabalik ni Cristo.